



Inatsisartuni ilaasortaq, Charlotte Pike, Inuit Ataqtigiit
/Maani

Nerlerit Inaat pillugu § 37 naapertorlugu apeqquteqaammut 2021-117-imut akissut

29-08-2021

Suliaq nr.: 2021 - 14917

Id. nr. 67297690

Asasara Charlotte Pike

Inatsisartut suleriaasianni § 37 naapertorlugu Nerlerit Inaat pillugu Naalakkersuisunut apeqquteqaateqarputit. Apeqqutitit uannit akineqartussatut innersuunneqarput. Apeqqutitit matuma kinguliani ataasiakkaarlugit allanneqarput, akissummillu malitseqarlutik.

Postboks 909

3900 Nuuk

Tlf.: (+299) 34 50 00

E-mail: box909@nanoq.gl

www.naalakkersuisut.gl

Apeqqut 1. Ittoqqortoormiiniit Nerlerit Inaannut utimullu qulimiguulimmik angallassinissaraluit taamaatiinnarneqartartut sumik peqquteqarpat?

Akissut: Apeqqummi ullut aallarfinnilluunniit aalajangersimasut apeqqutigineqanngimmata, 2021 tamakkerlugu taamaatitsinerit matuma kinguliani takussusissiorneqarput.

20. august 2021-mi timmisartuussinerit 565-it pilersaarusionerqarsimapput, taakkunanngalu 264-it naammassineqarsimallutik aammalu 300-t taamaatiinnarneqarsimallutik.

Aallarfissanik taamaatitsinerit 300-usunut peqqutaasut skemami matuma kingulianiittumi takuneqarsinnaapput:

Taamaatitsinerit - peqqutaasut	Amerlassutsit	Procentit
Teknikki	10	3%
Silap peqqutaalluni	95	32%
Ilaasussaqaannginneq	195	65%
Katillugit	300	100%

Najoqqutarisaq: Air Greenland

"Sila peqqutaalluni" pillugu:

Erseqqissaatigineqassaaq silap peqqutaanera qulimiguullip angallaviinnaanut ornigassaannaanulluunniit tunngasuunngimmat. Timmisartup suluusallip ingerlaqqiffissap angallavissaani silarlulersimappat, imaluunniit mittarfimmi, timmisartup suluusallip ingerlaqqiffissap miffissaatut sillimmatigisaani silarlulersimappat, qulimiguullip timmisartuussineranut sunniuteqartussaapput. Taamatutaaq aamma timmisartooq suluusalik ingerlaqqiffissaq teknikkikkut ajornartorsiuteqarpat, tamanna soorunami qulimiguulimmik timmisartuussinerit sunniuteqassaaq.

"Ilaasussaqaannginneq" pillugu:

Timmisartumi inissat qulimiguulimmi inissanit amerlanerummata, timmisartoq ilaasussanik immerniarlugu imaluunniit Ittoqqortoormiunut ilaasut nassiussallu tamaasa assartorniarlugit nalinginnaasumik Ittoqqortoormiit aamma Nerlerit inaata akornanni amerlanerusunik timmisartuussisoqartarpoq.

Assersuutigalugu Islandimiit ilaasut tikittut Ittoqqortoormiiniit aallartunit amerlaneruppata, Ittoqqortoormiit aamma Nerlerit Inaata akornanni timmisartuussinerit aallaqqaammulli pilersaarutaasut nikisineqarsinnaapput. Assersuutigalugu ilaatigut tamatuma kingunerisaanik Ittoqqortoormiiniit aallartussanik taamaatitsisoqarsinnaavoq, kiisalu tikittussat aallartussanik amerlaneruneranni pisariaqartitsineq naammassiniarlugu Nerlerit Inaanniit aallartussat ilaneqarsinnaallutik. Taamatut nikisitsinerup kingunerisaanik ullup ataatsip ingerlanerani timmisartuussinerit pilersaarutaasut ilaat taamaatinneqarsinnaapput aammalu nutaanik ikkussisoqarsinnaalluni. Tamanna akuttunngitsumik pisarpoq, tamannalu "ilaasussaqaqqingineq"-up ataani taamaatitsinerit kisitsisigit paasissutissat aqqutigalugit ersersinneqarpoq.

Aamma Air Greenlandimiit ilisimatitsissutigineqarpoq, Ittoqqortoormiit aamma Nerlerit Inaata akornanni qulimiguulimmik sullissinerit nalinginnaasumik Norlandair-ip Islandimiit imaluunniit Air Greenlandip Kitaaniit timmisartuisa tikinnissaannut ataqatigiissaarneqartartut. Qulimiguullip angalanissaanut tunngavissat arlallit apeqqutaasarput, taakkununga ingerlaqqiffissaq ilaalluni.

Tamatuma saniatigut Air Greenlandimit ilisimatitsissutigineqarpoq, qulimiguulimmik timmisartuussinerit bilitsit aallarfiissaq tikillugu tuniniarneqartartut. Aallarfiissamut bilitsinik tunisisoqarsimanngippat, nalinginnaasumik timmisartuussinerit aallarnissaq nalunaaquttap akunnera ataaseq sioqqullugu taamaatinneqartarpoq. Naggasiutigalugu ilisimatitsissutigineqarsinnaavoq, timmisartut suluusallit atorlugit Nerlerit Inaannut timmisartuussinerit akulikissusii Coronap tuniluunnera peqqutigalugu piffissami sivilisinerusumi ikinnerusarsimmata.

Apeqqu 2. Taakkunani Nerlerit Inaanniit Ittoqqortoormiunut – Ittoqqortoormiiniit Nerlerit Inaanullu umiatsiamik snescooterinillu qassit ingerlaqqissimappat?

Akissut: Taamatut angalasunut paasissutissanik peqarneris Naalackersuisunit ilisimaneqanngilaq, taamaattumillu apeqqummut akissuteqarsinnaanngillat.

Apeqqu 3. Taakkunani qassit Nerlerit Inaanniit Sport Ekspedition atorlugu takornariatut angallanneqarsimasutut naatsorsuunneqarpat?

Apeqqutip akinissaanut Nunanut Allanut, Inuussutissarsionerit, Niuernerit Silallu Pissusiinut Tunngassutilinnut Naalackersuisoqarfik akissuteqartinneqarpoq:

Akissut: "Taamatut angalasunut paasissutissanik immikkut ittunik peqarneris Naalackersuisunit ilisimaneqanngilaq."

Apeqqu 4. Islandimi Akureyrimiit Nerlerit Inaannut – Nerlerit Inaanniillu Akureyrimut takornarianik angallassisartumit tuluit nunaaneersumit qassit angallanneqartarnersut Naalackersuisut kisitsisaatigaat?

Apeqqutip akinissaanut Nunanut Allanut, Inuussutissarsionerit, Niuernerit Silallu Pissusiinut Tunngassutilinnut Naalackersuisoqarfik akissuteqartinneqarpoq:

Akissut: "Apeqqu 3-mut akissut takuuk."

Apeqqu 5. Takornarianik angallassisartumit tuluit nunaaneersumit angallassinik ilagisaqannginnera peqquataalluni Nerlerit Inaat Ittoqqortoormiillu akornanni timmisartuussinerit unitsiinnarneqartarneri Naalakkersuisut ilisimasaqarfigaat?

Akissut: Peqqutit matuma siuliani taaneqartut peqqutigalugit taamaatitsisoqartarneranik Naalakkersuisut ilisimasaqanngillat. Ittoqqortoormiit sullinneqarnerannut Air Greenlandimut kiffartuussinissamut isumaqatigiissuteqartoqarpoq, tassanilu Nerlerit Inaata timmisartut suluusallit atorlugit sullinneqarnerani akulikissusissat qulakkeerneqarput. Tamatuma saniatigut isumaqatigiissuteqartut akornanni nalunaarusiortarnermut ilusiliussamik isumaqatigiissuteqartoqarpoq, taannalu atorlugu isumaqatigiissutip naammassineqarnissaa qulakkeerniarneqarpoq. Nalunaarusiat malillugit kiffartuussinissamut isumaqatigiissutip naammassineqannginneranut takussutissaqanngilaq. Qulimiguulik Namminersorlutik Oqartussat saniatigut aamma sullitanik allanik kiffartuussisinnaavoq.

Apeqqu 6. Naalakkersuisut takornarianik angallassisartoq tuluit nunaaneersoq tapersersuunnarusunnerpaat?

Apeqqutip akinissaanut Nunanut Allanut, Inuussutissarsiornermut, Niuernermet Silallu Pissusiinut Tunngassutilinnut Naalakkersuisoqarfik akissuteqartinneqarpoq:

Akissut: "Naalakkersuisut isumaat malillugu, takornariatitsisartut Kalaallit Nunaanni takornariaqarnermut tunngasunik suliallit suliatik inatsisini sinaakkusiussat iluanni ingerlattartussaavaat. Kisianni ingerlatseqatigiiffik Nerlerit Inaanni suliaassanik, inatsisini sinaakkusiussat iluanninngitsunik suliaqartarsimaneranut Naalakkersuisut ilisimasaqanngillat. Taamaattumik suliaq taanna Naalakkersuisuniit sukumiisumik misissuiffigineqassaaq."

Apeqqu 7. Naalakkersuisut pisortat ingerlataanni Mittarfeqarfinni takornarianik angallassisartoq tuluit nunaaneersoq Nerlerit Inaanni Base-eqarnera qanormita isumaqarfigaa?

Akissut: Mittarfeqarfiit ilisimatitsissuteqarput, sakkutooqarfik apeqqummi taaneqartoq mittarfeqarfiup suliaasaqarfiisa avataanniittoq. Kisiannili sakkutooqarfik Mittarfeqarfinniit sarfamik pisisarpoq, taamatullu qaqutigooortumik akiliilluni Mittarfeqarfiit inissisarfiani errorsititsisarpoq uffartitsisarluunilu. Kiisalu takornariat ilaanneeriarlutik Mittarfeqarfinnit isumassorneqarnissamik pisariaqartitaminnillu allanik pisisarput, taamaalillutillu mittarfiup kaaviiartitaanut pitsaassusianullu ataatsimut isigalugit qaffatsitseqataasarlutik. Niuernermet tunngaveqarluni suleqatigiinnermut tassunga Naalakkersuisut isummersimangillat.

Apeqqu 7 a. Naalakkersuisut takornariarik angallassisartup tuluit nunaaneersup pinngortitatsinni Jameson Landimi angallassinneq killeqanngitsumik ingerlakkaa qanoq isumaqarfigaat?

Apeqqutip akineqarnissaanut Nunalerinnermut, Imminut Pilersornermut, Nukissiutinut Avatangiisinullu Naalakkersuisoqarfik akissuteqartinneqarpoq.

Akissut:

"Naalakkersuisut ilisimatitsissutigisinnaavaat, Kommuneqarfik Sermersooq *Assartuutit motoorinik ingerlatillit atorneqarneri pillugit Namminersorlutik Oqartussat nalunaarutaat nr. 10, 10. oktober 2013-imeersoq* naapertorlugu asimi assartuutit motoorillit atorneqartarnerat pillugu kommunimi malittarisassanik suliaqarsimammat. Kommunimi malittarisassat malillugit Ittoqqortoormiit eqqaanni Jameson Land-ip kujammut

kangisissortaani assartuutiniq motorilinnik atuisoqarsinnaavoq. Asimi assartuutit motorillit atorlugit angalanermi kommunimi malittarisassat malinneqanngippata, unioqqutitsineq politiiqut nalunaarutigineqartussaavoq."

Neriuppunga qulaani allaqqasuni apeqquteqaatitit akineqartut.

Inussiarnersumik inuulluaqqusillunga

Naaja H. Nathanielsen

Naaja H. Nathanielsen